

19 Mac 2025

**SIARAN MEDIA**  
Untuk Siaran Segera



## **ISLAMIC RELIEF MENYANJUNG JASA DAN PENGORBANAN KAKITANGAN YANG GUGUR DI SUDAN**

Islamic Relief berduka cita atas pemergian salah seorang kakitangan yang paling disayangi dan paling lama berkhidmat di Sudan.

Izzeldin Mohamed Juma, 49 tahun, telah mendedikasikan seluruh hidupnya untuk membantu orang lain. Beliau terbunuh pada 11 Mac ketika melindungi keluarganya daripada serangan sekumpulan lelaki bersenjata yang menyerbu dan merompak rumah mereka di kawasan Jebel Aulia, Khartoum.

Peperangan di Sudan yang hampir mencecah dua tahun telah mencetuskan salah satu krisis kemanusiaan terburuk di dunia, mengakibatkan keruntuhan undang-undang dan ketenteraman awam. Serangan terhadap orang awam berlaku tanpa sebarang hukuman, sementara ramai petugas kemanusiaan turut terkorban dalam keganasan yang berterusan.

Izzeldin telah menabur khidmat bersama Islamic Relief selama lebih 30 tahun, terutamanya sebagai pengawal keselamatan dan penyambut tetamu. Doa dan ingatan kami mengiringi keluarga Izzeldin termasuk isteri dan 10 orang anak mereka.

Pengarah Negara Islamic Relief Sudan, Elsadig Elnour berkata:

"Izzeldin akan dirindui oleh seluruh warga Islamic Relief. Beliau akan terus dikenang atas kesetiaan, keberanian, dan dedikasinya dalam memastikan keselamatan orang lain. Dikenali sebagai seorang yang baik hati, pemurah, dan penuh kasih sayang terhadap keluarga serta komuniti, kehilangannya amat dirasai.

"Di tempat kerja, beliau seorang yang sangat berdedikasi, sentiasa berusaha melangkaui tanggungjawabnya demi menjaga keselamatan orang ramai dan aset organisasi. Di luar pekerjaan, beliau berperanan sebagai Imam di masjid kawasan kediamannya, di mana kehadirannya membawa ketenangan dan inspirasi kepada ramai. Pengaruhnya akan terus hidup dalam ingatan mereka yang mengenalinya, dan semangat serta nilai yang dipegangnya akan kekal menjadi inspirasi buat kami semua."

Sebagai pengawal dan penyambut tetamu, Izzeldin sering menjadi wajah depan Islamic Relief dan amat dihormati serta disayangi oleh komuniti.

Izzeldin dilahirkan dan dibesarkan di Zalingei, Darfur Tengah, wilayah luas di barat Sudan. Rakan sekerja dan keluarganya mengingati beliau sebagai seorang yang bertanggungjawab dan sentiasa berusaha membantu orang lain sejak kecil.

Beliau menyertai Islamic Relief sebagai pekerja pembersihan pada tahun 1991 sambil meneruskan pelajaran sehingga berjaya melanjutkan pengajian di Universiti Juba, Khartoum dalam bidang Bahasa Inggeris.

Selepas berkahwin, beliau tinggal bersama keluarganya di Darfur sehinggalah konflik dan serangan ke atas orang awam yang berlarutan sejak 2003 memaksa mereka berpindah ke Khartoum.

Apabila perang meletus di Khartoum pada April 2023, beliau tetap memilih untuk tinggal di rumah dan kawasan kejiranan yang dicintainya demi menyokong keluarganya yang besar.

Seperti kebanyakan organisasi kemanusiaan, Islamic Relief terpaksa menutup sementara pejabat di Khartoum dan berpindah ke Port Sudan di bahagian timur negara itu. Akibatnya, Izzeldin terpaksa meninggalkan sementara tugasnya pada Jun 2024, tetapi beliau tetap bertekad untuk kembali berkhidmat secepat mungkin.

Selama 40 tahun, Islamic Relief terus berusaha meringankan penderitaan rakyat Sudan, membawa harapan dan bantuan di saat-saat paling genting. Di sebalik krisis yang berpanjangan, komitmen kami dalam menyelamatkan nyawa tidak pernah goyah.

Hari ini, ketika keluarga besar Islamic Relief di seluruh dunia meratapi pemergian rakan kami yang tercinta, kami mengenang jasa dan pengorbanannya dengan penuh penghargaan. Terima kasih atas khidmat baktinya yang luar biasa selama berdekad-dekad, semangat dan legasinya akan terus hidup dalam perjuangan kami.

Sebagai tanda penghormatan kepada beliau, kami memperkukuh tekad untuk terus membantu keluarga yang terjejas akibat peperangan di Sudan. Selain menyalurkan bantuan kemanusiaan yang amat diperlukan, kami akan terus berjuang demi keamanan serta memastikan perlindungan bagi orang awam dan petugas kemanusiaan.

**Semoga Allah mengampuni beliau, merahmatinya, dan mengurniakan syurga tertinggi buatnya.**

-TAMAT-

## **Mengenai Islamic Relief**

Islamic Relief merupakan sebuah organisasi kemanusiaan antarabangsa yang ditubuhkan pada tahun 1984 sebagai tindak balas terhadap isu kebuluran di Afrika Timur. Ibu pejabat Islamic Relief terletak di Birmingham, United Kingdom. Islamic Relief beroperasi di lebih 40 buah negara dan telah membantu lebih 145 juta orang. Kini, Islamic Relief Worldwide merupakan antara salah satu badan amal dan Pembangunan terbesar di dunia.

## **Mengenai Islamic Relief Malaysia**

Islamic Relief Malaysia telah beroperasi sejak 2004, bertujuan untuk meneruskan bantuan kemanusiaan Islamic Relief di Rantau Asia-Pasifik. Kini, Islamic Relief Malaysia berperanan sebagai pejabat penjana dana dan pelaksana projek tempatan dan antarabangsa.

Maklumat lanjut mengenai Islamic Relief Malaysia boleh diperoleh di [www.islamic-relief.org.my](http://www.islamic-relief.org.my)

---

*Dikeluarkan oleh: Komunikasi Strategik, Pejabat KPE Islamic Relief Malaysia.*

*Untuk keterangan lanjut, hubungi Sis Zafirah di talian 019-220 1788 atau e-mel ke [Zafirah.Zahari@islamic-relief.org.my](mailto:Zafirah.Zahari@islamic-relief.org.my)*